

समे – 12:25

<><><><><><>

PM-Olaf Meet

जर्मनी दे चांसलर ओजाफ शोलज होरें अज्ज प्रधानमंत्री नरेन्द्र मोदी हुंदे कन्नै मलाटी कीती। दवै नेता 7में अंतर सरकारी परामर्ष दी अज्ज दपैहरी मगरा राष्ट्रीय राजधानी दिल्ली च सह-अध्यक्षता करगन। आईजीसी इक पूरा पराता सरकारी ढांचा ऐ जेहदे तैहत दौनें पक्खें दे मंत्री अपनी अपनी मतेहत जिम्मेदारिएं आले क्षेत्रें च चर्चा करदे न ते अपने बचार'बमर्श दे नतीजें दी रिपोर्ट प्रधानमंत्री ते चांसलर होरें गी सौंपदे न। भारत उनें चुनिंदा मुल्खें दे समूह च शामिल ऐ जिंदा जर्मनी कन्नै इयै नेई तालमेल ते साथ सैहयोग सरबन्धी बवस्था ऐ। आईजीसी दी बैठक च मुख्य तौर पर ध्यान ते चर्चा तकनालोजी पर ते लगातार टिकाऊ विकास ते नमिएं काह्डें पर बचार बमर्श होने दी मेद ऐ। दौनें पक्खें बश्कार उभरदी तकनालोजी दे क्षेत्र च सैहयोग बधाने पर बी चर्चा होई सकदी ऐ। एहदे अलावा रक्षा ते सुरक्षा सैहयोग बधाने पर बी गल्लबात होग। दौनें नेता दपैहरी दपक्खी गल्लबाज करगन। इस दरान रक्षा ते सुरक्षा सैहयोग, आर्थिक सैहयोग होर मजबूत करने, हरित ते लगातार टिकाऊ विकास च सांझेदारी पर गल्ल होग। प्रधानमंत्री ते लर्मनी दे चांसलर एशिया प्रशांत जर्मन बपार दी 18मीं बैठक गी बी संबोधत करगन। ओलाफ शोलज होरें भारत दे त्रै दिनें दे दौरे पर कल रातीं नमीं दिल्ली पुज्जे हे।

<><><><><><>

Terror Attack

बारामुला जिले च कल संजा होए दे आतंकवादी हमले च घायल इक होर जुआन शहीद होइ गेआ ऐ। ताजा जानकारी मूजब एहदा इलाज चला'रदा हा। पर इलाज दरान गै ओह वीरगति गी प्राप्त होइ गेआ। इस हमले च अजें तगर कुल त्रै सैनिक शहीद होइ चुके दे न। 2 पिट्ठुएं दी बी इस हमने च मौत होइ ही। घायल 2 होर दा इलाज जारी ऐ। सेना दी चिनार कोर नै सोशल मीडिया पोस्ट च दस्सेआ जे बारामुला इलाके च आतंकवादिएं ते सुरक्षाबलें बश्कार गोलीबारी होई। आतंकवादिएं पैहले सेना दी गड्डी उप्पर हमला कीता। उपराज्यपाल मनोज सिन्हा होरें सेना, जम्मू कश्मीर पुलिस ते सिविल प्रशासन दे उच्च

अधिकारिणं दे कन्नै गल्ल कीती। उनें आतंकवादिणं दे सफाए लेई बनकदी ते लोड़चदी कारवाई करने दा आदेश दित्ता ऐ। उनें बारामुला दे डिप्टी कमीशनर होरे गी हमले च मारे गेदे सेना दे पिट्ठुणं दे परोआरे गी हर संभव मदद पताने लेई गलाया। उपराज्यपाल होरे पीड़ित परोआरे कन्नै अपनी हमदर्दी जाहर कीती।

<><><><><><><>

Omar Delhi

मुख्यमंत्री उमर अब्दुल्ला होरे कल प्रधानमंत्री नरेन्द्र मोदी, रक्षामंत्री राजनाथ सिंह ते शिड़क, यातायात ते राष्ट्रीय जरनैली शिड़क सरबन्धी केन्द्री मंत्री नितिन गडकरी हुंदे कन्नै मलाटी कीती। उनें केन्द्र शासत प्रदेश दे केन्द्रीय मंत्रिमंडल आस्सेआ जम्मू कश्मीर दा राज्य दा दर्जा ब्हाल करने बारे पारित प्रस्ताह दी इक कापी प्रधानमंत्री होरे गी सौंपी। इस प्रस्ताह गी उपराज्यपाल मनोज सिन्हा होरे बी मंजूर करी दित्ते दा ऐ। आकाशवाणी जम्मू संवाददाता दी रिपोर्ट मूजब उमर अब्दुल्ला होरे केन्द्री गृहमंत्री अमित शाह हुंदे कन्नै मलाटी कीती ते जम्मू कश्मीर कन्नै सरबन्धत बक्ख-बक्ख मामले पर चर्चा कीती। जम्मू कश्मीर दे मुख्यमंत्री दा औहदा संभालने परैत एह उमर हुंदी दिल्ली दी पैहली यात्रा ही। उमर अब्दुल्ला होर 16 अक्टूबर गी जम्मू कश्मीर दे मुख्यमंत्री दे हैहदे दी सगंध लैती ही। 18 अक्टूबर गी उमर अब्दुल्ला हुंदी अध्यक्षता च पैहली कैबिनेट बैठक लग्गी जेहूदे च जम्मू कश्मीर दा राज्य दा दर्जा ब्हाल करने बारे इस प्रस्ताह पारित कीता गेआ। उमर अब्दुल्ला होर प्रधानमंत्री हुंदे कन्नै बी बैठक लाई। इस दरान उनें जम्मू कश्मीर कन्नै सरबन्धत बक्ख-बक्ख मामले जेहूदे च जम्मू कश्मीर दी मजूदा सुरक्षा स्थिति ते विकास सरबन्धी कम्म शामिल हे, पर चर्चा कीती। मलाटी दरान उमर होरे प्रधानमंत्री होरे गी रिवायती कश्मीरी शाल बी भेंट कीता। उमर होरे जम्मू कश्मीर दा राज्य दा दर्जा परतियै ब्हाल करने बारे प्रस्ताह बी उनेंगी सौंपेआ। उमर होरे रक्षा मंत्री राजनाथ सिंह हुंदे कन्नै बी मलाटी कीती ते जम्मू कश्मीर दी मजूदा सुरक्षा स्थिति बारे बी चर्चा कीती। मुख्यमंत्री होरे केन्द्र शासत प्रदेश दी मजूदा सुरक्षा स्थिति गी बेहतर बनाने च सैहयोग करने लेई गलाया। तां जे इत्थें विकास बाद्धे आले कम्म सबूरे होई सकन। उमर अब्दुल्ला होरे शिड़क, यातायात ते राष्ट्रीय जरनैली शिड़क सरबन्धी केन्द्री मंत्री नितिन गडकरी हुंदे कन्नै बी मलाटी कीती ते जम्मू कश्मीर च शिड़क राबता बेहतर करने सरबन्धी परियोजनाएं बारे दस्सेआ।

<><><><><><><>

Transport Department

ट्रांसपोर्ट मंत्री सतीश शर्मा होरें सिविल सचिवालय श्रीनगर च जम्मू कश्मीर शिड़क यातायात कारपोरेशन ते स्टेट मोटर गैराज मैहकमे दे अलावा ट्रांसपोर्ट मैहकमे दे कम्मकाज दी समीक्षा रेई इक बैठक दी अध्यक्षता कीती। मंत्री होरें मैहकमे गी निर्देश दित्ता जे ओह बेरोजगार युवाएं दी आजीविका कमाने लेई प्रोत्साहित करन। उनें परमट फीस गी 50 प्रतिशत करने लेई गलाया, एह फीस 1 लख 50 जहार रपे ऐ ते उनें इसी 75000 रपे करने लेई गलाया। मंत्री होरें एह बी हिदायत दित्ती जे व्यवसायिक गडिडएं दे डरैवरें दी हर म्हीने मैडिकल जांच दा आयोजन कीता जा तां जे गडिडयां चलाने लेई उंदी फिटनेस ते योग्यता जकीनी बनाई जाई सकै। उनें शिड़क परिवहन प्राधिकरण गी बी निर्देश दित्ता जे ड्राइविंग टैस्ट दरान लाइसेंस जारी करदे बेल्ले सख्त उपाह जकीनी बनान। उनें ड्राइविंग लाइसेंस आवेदन दे हुनर परीक्षण गी जकीनी बनाने लेई आईडीटीपी परियोजना गी तोले शा तौले पूरा करने पर जोर पाया। उनें प्रदेश च सार्वजनिक परिवहन प्रणाली च सुधार करने लेई मुत्तलका मैहकमे गी किट्ठे रलियै कम्म करने दी हिदायत दित्ती।

<><><><><><><>

CJI

न्यायमूर्ति संजीव खन्ना होर भारत दे अगले प्रधान न्यायधीश होंगन। विधि मंत्री अर्जुन राम मेघवाल होरें सोशल मीडिया दी इक पोस्ट च आखेआ जे राष्ट्रपति द्रौपदी मुर्मू होरें प्रधान न्यायधीश डी.वाई.चन्द्रचूड़ हुंदे कन्नै सलाह मशवरे परेंत न्यायमूर्ति खन्ना होरें गी 11 नवम्बर थमां भारत दा प्रधान न्यायमूर्ति नियुक्त कीता ऐ। ओह देसे दे 51में प्रधान न्यायधीश होंगन ते अगले बरे 13 नवम्बर गी सेवानिवृत होई जांगन। न्यायमूर्ति संजीव खन्ना होरें 18 जनवरी 2019 गी सर्वोच्च अदालत दे न्यायधीश दा औहदा सांभेआ हा। इस दरान उनें सर्वोच्च अदालत दे बक्ख-बक्ख संविधान पीठ च कम्म कीता ते नमें महत्वपूर्ण फैसले कीते। उंदे फैसले दे व्यक्तिगत आजादी दी प्राथमिकता ते मजबूत लोकतांत्रिक भागीदारी गी प्रमुखता मिली। न्यायमूर्ति चन्द्रचूड़ होर 9 नवम्बर 2022 गी भारत दे प्रधान न्यायधीश दा औहदा सांभेआ हा ते ओह औंदी 10 नवम्बर गी सेवानिवृत होआ करदे न।

<><><><><><><>